

26 Oktober 2010

Di Malaysia, Usahawan Wanita Membincangkan Usaha Memperbaiki Perniagaan Baru

Oleh Nicholas Papp

Penulis Khas



Kuala Lumpur, Malaysia - Para usahawan wanita berkongsi pengalaman, amalan terbaik dan teknik penyelesaian masalah kreatif mereka untuk membina perniagaan yang lebih berjaya dalam forum yang dianjurkan oleh Warisan Global dan Kedutaan A.S. di Malaysia.

Ahli-ahli panel membincangkan pembiayaan perniagaan baru dalam program Sembang-Sembang di Kuala Lumpur pada 20 Oktober.

Sembang-Sembang adalah sebahagian daripada siri bengkel yang bertujuan memajukan ekonomi dan sosial wanita melalui keusahawanan. Bengkel *Sembang-Sembang* pada 20 Oktober menumpukan pada pembiayaan perniagaan baru.

Lebih 50 wanita (dan beberapa orang lelaki) terlibat dalam dialog dua jam bertajuk "Usaha Memperbaiki Perniagaan Baru Anda." Perbincangan menampilkan ahli-ahli panel yang terdiri daripada para usahawan tempatan serta Mark Nager, penceramah A.S. yang mengendalikan program "Start Up Weekend" di empat bandar di Malaysia.

Perbincangan dikendalikan oleh usahawan tempatan dan ketua pegawai operasi Warisan Global, Vani Mahadevan untuk mengenalpasti pembiayaan perniagaan baru dan mengembang perniagaan dan pelaburan secara berkesan.

Program ini memperlihatkan sokongan Kedutaan A.S. untuk program keusahawanan di Malaysia bagi memberi peluang ekonomi kepada lebih ramai masyarakat di Malaysia.

Program-program terdahulu dalam siri ini membincangkan topik-topik seperti memperkasakan wanita, keusahawanan sosial, penggunaan media sosial dan peranan ibu dalam mempengaruhi usahawan. Program pada bulan Disember akan membincangkan perniagaan keluarga.

BERBAKTI KEPADA MASYARAKAT



Pada 20 Oktober, dua alumni program pertukaran yang berkaitan dengan keusahawanan memberi taklimat kepada para hadirin berkenaan pengalaman program pertukaran mereka.

Usahawan wanita Malaysia yang menyertai program Sembang-Sembang menumpukan perhatian kepada pembiayaan perniagaan baru.

Mahadevan, yang menyertai Program Kepimpinan Pelawat Antarabangsa yang inovatif berjudul “Permulaan Baru: Keusahawanan dan Inovasi Perniagaan” termasuk lawatan ke beberapa bandar di A.S. bercakap tentang perbezaan antara usahawan Amerika Syarikat dan Malaysia.

Usahawan Amerika tidak teragak-agak untuk berbakti kepada masyarakat mereka dan berkongsi idea-idea mereka dengan orang lain, katanya. Mahadevan menggalakkan para hadirin untuk membaca entri terkini yang beliau sumbangkan di blog program pertukaran yang berjudul “We are Greater than You and I.”

Penceramah lain, Tunku Azela Tunku Aziz, adalah usahawan teknologi di Multimedia Development Corporation di Malaysia. Beliau mengambil bahagian dalam Sidang Kemuncak Keusahawanan Wanita baru-baru ini yang merupakan kerjasama kerajaan-swasta pertama dalam kumpulan Kerjasama Ekonomi Asia Pasifik (APEC) yang mengiktiraf peranan penting wanita dalam menggalakkan pertumbuhan ekonomi.

Potensi ekonomi wanita di Asia Tenggara masih banyak belum dimanfaatkan, kata Tunku Azela. Kemajuan wanita adalah sangat penting untuk kemajuan negara, dan penyertaan ekonomi wanita adalah penting untuk kemakmuran ekonomi. Selain itu, penyertaan wanita dalam ekonomi dapat memberi kesan ketara kerana mereka melaburkan lebih 90 peratus daripada pendapatan mereka kembali kepada keluarga dan masyarakat.

Program ini adalah yang keenam dalam siri bengkel *Sembang-Sembang*. Program popular ini telah menarik kumpulan yang lebih besar setiap bulan. Sekitar separuh peserta dalam program 20 Oktober adalah peserta baru yang datang bersama teman-teman atau rakan sekerja yang pernah mengikuti program ini.

Dalam perbincangan selepas program ini, seorang peserta program memberitahu para pegawai kedutaan bahawa beliau “mendapati maklumat yang dikongsi dalam program ini sangat penting untuk berjaya dalam perniagaan baru.”

Seorang peserta lain berkata, “Program seperti ini dapat mencipta peluang ekonomi yang lebih besar untuk lebih ramai rakyat Malaysia.” Para peserta sangat menghargai kesempatan untuk beramah mesra berikutnya perbincangan panel *Sembang-Sembang*.

Sembang-Sembang adalah program bulanan bagi usahawan-usahawan wanita untuk berkongsi inspirasi, harapan dan cabaran sebagai usahawan dalam suasana santai dan tidak formal. *Sembang-Sembang* ditaja bersama oleh Kedutaan A.S. di Malaysia dan Warisan Global, sebuah syarikat yang mempunyai pelanggan di kalangan sektor swasta dan kerajaan yang berhasrat untuk melaksanakan program-program yang memberi manfaat kepada masyarakat.

Tujuan *Sembang-Sembang* adalah untuk memberi peluang mereka menjalin hubungan yang unik di persekitaran yang selamat bagi membincangkan keusahawanan dan membantu usahawan wanita membentuk kepercayaan diri mereka. Siri bengkel ini dibiayai melalui geran kecil Kedutaan A.S. di Kuala Lumpur.

Untuk mendapatkan maklumat lanjut, lihat video [YouTube Sembang-Sembang](#). Program ini dipromosikan di [Facebook](#) dan juga di [Twitter GEWMalaysia](#).